

卷之四

大明太宗文皇帝實錄卷之一百十四

永樂十八年春正月庚子朔 上御奉天殿

受朝賀太宴文武群臣及四夷朝使 辛丑

改四川布政司右叅政房安於交趾布政司

癸丑賜八荅黑商等處使臣滿剌馬黑麻

等宴 交趾賊艮師魯范公擲等聚衆在亂

總兵官豐城侯李彬追至石室縣與戰師魯

敗走斬其偽翊衛將軍艮獲等五百餘人時

公擲在威蠻州聞之以其衆走快州而交趾

都指揮孫霖亦破賊於嘉林州殺賊將范沈
等生禽賊首黎行清化縣黎利聚眾立寨於
嘉江都指揮徐諤率兵攻破之利遁去敗走
乙巳享 太廟命皇太子行禮 緣海諸
衛奏有倭寇三百餘人船十餘艘於金鄉福
寧及井門程溪等處登岸殺掠復東南行勅
遼東總兵官廣寧伯劉榮及山東浙江福建
濱海諸衛嚴兵為備賊至則相執勅捕 疊
州弁朶等九簇頭目哈卜等來歸請授職三

年一貢從之 命哈卜為千戶餘為百戶各
賜鈔幣誥勅冠帶衣幣欵真河等處女直野
人兀令哥等來朝命兀令哥為建州衛副千
戶木郎哈為百戶 丙午以將祀南郊百官
受誓戒于文華殿 戊申穩克河野人乞松
哈來歸命為副千戶令居喜樂溫河衛加以
賜賚 己酉大祀 天地於南郊 皇太子
代行禮畢遣太常寺丞張林泉復命 庚戌
陞行人司行人楚鑑為山西按察司僉事

癸丑立春 上御奉天殿群臣行賀禮賜宴

甲寅 上諭行在兵部臣曰將軍百戶二十四人宿衛歲久宜簡其年及六十者陞之於是以前徐諒為陝西都指揮僉事左岱為陝西行都司都指揮僉事趙瑛為山西都指揮僉事陳榮為山西行都司都指揮僉事元宵節觀燈賜文武羣臣宴及節鈔有差 戊午肅王橫訃聞 上輟視朝三日賜祭謚曰莊命有司治喪塋王 太祖高皇帝第十三

子母妃卽氏性謹序好文學洪武十一年封漢王二十五年改封肅二十八年之國甘肅王居國能安靖循理云 己未和寧王阿魯台及也先土干遣使臣都督恰木丁等貢馬九百匹各賜鈔及綺靛衣并給馬直 晉恭王妃謝氏薨訃聞遣官賜祭命有司治喪葬左軍都督僉事何濬卒濬鳳陽五河人父壽會州衛指揮僉事 上舉兵靖難壽以全城歸附陞都指揮僉事再陞北平都指揮同

知濟年十八九隨父歷行陣以功授會州衛
指揮僉事未幾陞本衛指揮同知父卒罷都
指揮同知內難平陞左軍都督僉事至是卒
遣官賜祭命有司治喪葬賻贈有加 甲子
福建漳州府龍溪縣掌縣事知州劉孟雍卒
孟雍江西南昌人以賢良擢龍溪知縣縣與
潮接境山谷崑阻有陳永定者負險為寇抄
掠旁縣累歲不能制孟雍至以計掩捕之先
是為邑者多貪闇不識吏貪緣為奸徭役不

均民富者幸免貧者不勝其困多竄徙孟雍
覈其之戶虛實而等差其役流民聞者相率
來歸勸農務耕禁淫祠寬刑罰衛善抑姦邑
以大治秩滿陞安州知州龍溪民相率奏乞
留之授知州職還治龍溪至是卒 乙丑命
平江伯陳瑄充總兵官率領舟師漕運糧儲
赴北京 閏正月庚午朔 癸酉賜和寧王
阿魯台等使臣都督哈木失等宴 甲戌建
州毛憐二衛都指揮李顯忠猛哥帖木兒等

奏舉各衛千百戶請陞除指揮等職 上以
無功不許仍賜勅戒諭而賜其來者鈔幣遣
還 夜有星如碗大赤色光燭地起自房宿
正南行至近濁 丙子 上命行在翰林院
學士兼右春坊右庶子楊榮翰林院學士兼
右春坊右諭德金幼孜並為文淵閣大學士
兼翰林院學士賜宴于禮部 丁丑女直頭
目完者帖木兒等來朝貢馬 戊寅甘肅總
兵官都督費瓖奏涼州有遺棄閒田宜令軍

士耕種以備儲積從之

己卯四川松潘番

僧遠丹監叅等來朝貢馬

設北京武清縣

小直沽及滄州長蘆批驗鹽引所各置大使

一員

庚辰改北京行太僕寺丞李耿為光

祿寺丞山東按察司僉事錢遂志于陝西按

察司擢人材馬麟為湖廣左布政使盛頤為

江西左布政使趙瑛為右叅議俞景周為山

東左布政使周克敬為廣西左布政使孫豫

為山西右布政使金恕為右叅議江閩為河

南右布使艾瑛為浙江布政使吳衡為陝西
左叅政陸勉為四川左叅政楊敬為福建右
叅政李恭為廣東右叅政 開平備禦成安
侯郭亮言糧餉不給請令所司於京倉運三
萬石貯開平以備軍儲從之 辛巳夜有星
如盞大青白色有光出自太尊旁西行至游
氣 癸未日上生背氣一道青赤色同時生
重半暈左右弭皆赤黃色有白虹貫兩弭隨
生璣氣一道白色 乙酉順天府固安縣民

王晉順以妖言伏誅 夜月食 丙戌改鴻
臚寺右寺丞范寧為尚寶司丞 丁亥給授
龍封泰寧侯陳瑜永康侯徐安應承伯孫恩
誥命 巳丑勅交趾總兵官豐城侯李彬朕
命尔撫綏一方蓋欲軍民各安其所而致盜
賊紛紛將何以道責今調雲南四川等處官
軍益尔宜盡心殫慮早滅此賊若玩時愒日
致賊益滋在於國典必亦難恕 庚寅陞錦
衣衛指揮使費瑾為陝西都指揮僉事 辛

卯交趾總兵官豐城侯李彬列奏都指揮劉震于瓚吳興前敗績之罪及為事都指揮陳濬禦寇之績上命械震等三人赴闕而宥濬罪俾復職癸巳夜有星如碗大青白色尾跡有光起自中台西北行至近濁乙未許州進白兔戊戌韃靼官指揮僉事拜住與其子阿失失來朝奏願居京師陞為指揮同知賜予如例二月己亥朔甲辰以安王薨無嗣革其長史司等衙門丁未遣官

釋奠先師孔 戊申祭 太社太稷命皇太

子行禮 遣官祭先農 己酉山東蒲臺縣

妖婦唐賽兒作亂賽兒縣民林三妻少好佛

誦經自稱佛母詭言能知前後成敗事又云

能剪紙為人馬相戰闔往來益都諸城安丘

莒州即墨壽光諸州縣扇誘愚民於是奸人

劉士信劉俊丁谷剛賓鴻徐輝王宣白拜兒

郝允中高羊兒蘭復昇張思名王住兒楊三

楊道深張彥祥趙士禮程彥剛董彥臯等各

率衆從之擁衆五百餘人據益都却石棚寨
遂劫掠鄉村驅脅良善青州左衛指揮高鳳
領兵捕之賊夜乘間衝擊官兵潰散鳳等皆
陷都司布政司按察司以聞遣人馳驛招撫
之 辛亥趙府右長史董子莊卒子莊名琰
江西樂安縣人博學有操行洪武壬子舉鄉
貢免會試除雲南學官後用擢薦廣東茂名
知縣和易近民不為赫赫立名譽而民戴其
惠永樂中與修大典陞北京國子監司業嚴

重善教導再陞趙王府右長史恭勤小心隨
事匡政不為苟容王時所行屢愆禮度 上
輒以責長史子莊百挫不變而執守愈堅是
當陪祀國社子莊夙興嚴衣冠齋室端坐而
卒 乙卯朝鮮國王李禔遣陪臣洪敷等貢
方物賜鈔及綺帛 戊午貴州烏撒衛指揮
僉事蔡禮獻白兔守居庸關隆慶衛指揮袁
訥言車坊東北自荆子村至狼山西十七處
舊皆隆慶三衛軍守瞭今都督僉事章安以

其守備禦興和而以懷來寧永二衛撥軍代
守迂遠弗便 上命懷來永寧伯叅守贍仍
令都督僉事章安總督 己未勅甘肅總兵
官都督費獻曰今後陝西行都司所屬軍餘
人等有犯笞杖徒流遷徙罪者就發本地極
邊處贍守煙墩其為事官以下犯死罪者送
京師 陞廣東道監察御史劉安為鴻臚寺
右寺丞翰林院典籍陳壽為本院檢討平涼
府知府仕英為兩淮鹽運使改陝西按察副

使趙彬於貴州按察司 丙寅命安遠侯柳
升充總兵官都指揮僉事劉忠為副率兵討
山東亂寇時妖婦唐賽兒據寨恃險招諭不
服故命討之 三月己巳朔詔在外軍民夫
匠於北京工作者咸復其家 勅總兵官安
遠侯柳昇曰今命介領兵捕賊正欲除害以
安良善須嚴約束士卒毋令剪伐桑柘撤毀
廬舍發掘墳塚殺害寡弱剽掠貧畜以擾吾
民蓋國民為本不能撫循而暴虐之是傷其

本宜體朕至意 庚午以王哲為浙江道監察御史哲初由行人任給事中坐累謫戍邊至是有薦其才者故復用 壬申勅總兵官安遠侯柳升曰賊屯山寨其衆雖少然蠱尾有毒宜加意防慎不可忽易前高鳳輕進致敗不可不戒困之之道但斷其汲道防其走逸晝夜勿怠而已 癸酉山東賊首賓鴻等率衆攻安丘知縣張旗縣丞馬搗集民丁晝夜拒守 乙亥直隸沂州衛奏莒州賊董彥

臯等聚衆二千餘人以紅白旗為號縱火打劫莒州千戶孫恭等往招撫不服殺其從者勢頗猖獗已分官軍助守莒州 上勅安遠侯柳升分兵勦之 丙子命工部京師民居近皇城當遷者量給所費擇隙地處之 浙江海寧等縣言潮水淪沒邊海塘岸二千六百六十餘丈延及吳家等埧命有司量起軍民脩築 夜有星如雞子大赤色尾跡有光出天棊西北行入大尊旁 庚辰行在光祿

寺丞高致有罪棄市 辛巳巡按山東監察御史楊賢等奏鰲山衛千戶周興等哨至即墨縣城西南坡夜遇賊焚劫民家興督軍攻之賊殺傷官軍遂入城縱火焚官署倉庫奪馬畜財物 上勅總兵官安遠侯柳升曰却石棚寨之寇乏糧則困此易為耳聞莒州安丘即墨兗獮若寨已破或守已定即移兵赴彼不可以緩 是日總兵官安遠侯柳升兵至益都圍賊於却石棚寨遣旗手衛指揮

吳亮招之不應及晚賊耿童兒下寨乞降云寨中食盡且無水東門舊有汲道賽兒等誘趨此宵遁升即往據之薄暮升慮賊劫營令諸軍稍退夜二鼓賊罷官軍營與戰多被殺傷都指揮劉忠力戰中流矢死寨兒及劉信等潛遁黎明升等始覺分兵追捕獲賊黨劉俊等男婦百三十四人賊墜巖谷死者甚死而賽兒等竟不獲 癸未遣鴻臚寺丞李本凌友諒等往諭勒白等百餘寨寨首日兒勒

白在西南最遠朝貢未通故遣使撫諭焉
甲申行在兵部言各處鎮守官缺於是命都
指揮葉高往薊州李昌往山海吳顯往真定
胡貴往宿州王傑往揚州徐甫往永平山
東都指揮僉事衛青大敗賊衆于安丘先是
賊首賓鴻等攻安丘知縣張旗縣丞馬撫集
民夫八百餘人以死拒戰賊不能攻復集莒
州即墨之衆男婦合萬餘人併力攻城聲言
必屠城中人時青備倭海上聞安丘圍急率

千騎晝夜兼行猝到城下奮擊敗之賊收餘
衆再戰城中人亦鼓譟出擊賊大敗賓鴻等
遁去殺賊二千餘人生禽四千餘人皆斬之
而收其孥時城中已不支使青至稍到必陷
于賊既而安遠侯柳升至青迎謁升怒其不
待已猝出之不為屈青是日鰲山衛指揮僉
事王真亦以兵百五十人擊敗賊衆于諸城
盡戮之各械首惡送京師山東之賊悉平
丙戌上聞唐賽兒等遁降勅切責安遠侯

柳升 丁亥山東都指揮僉事衛青鰲山衛
指揮僉事王真捷奏至 上喜賜勅獎諭之
陞青山東都司都指揮使真都指揮同知仍
命具官軍功次來聞將陞賞之 戊子山東
械至賊首劉俊王宣徐輝白拜兒高羊兒蘭
復昇張思名王柱兒楊三張彥祥趙士禮程
彥剛王仲賢楊道深等皆伏誅餘雖從賊而
未登寨拒戰者免死編成交趾其山東布政
司使儲誕張海叅政盧信林鍾叅議曾光按

察使劉本副使王璠王肅僉事王孜劉先林
禎張建及賊所發郡縣官吏皆以縱賊為亂
不言誅 己丑命榮昌伯陳智為左叅將協
贊交趾總兵官豐城侯李彬勦捕蠻寇 癸
巳勅總兵官安遠侯柳升具官軍戰沒者姓
名來聞用恤其家 行在戶部奏廣東崖州
言所屬寧遠縣山水暴泛衝決田稼漂人民
壞蘆舍已遣官覈實其租稅宜蠲免又奏所
遣官言踏視民田有不可耕者宜改撥旁近

閒田與之耕種皆從之 甲午勅遼東總兵
官廣寧伯劉榮勅殺倭寇之時都指揮并領
隊官旗曾經力戰者就彼各陞一級退縮者
不陞務合至公陞畢具名來聞 乙未陞浙
江紹興府通判秦川為通政司右通政改雲
南按察司僉事龔燧於廣西按察司燧初至
京上言民瘼所司劾其過許下錦衣衛獄
上嘉其直而宥之 丙申命代王子廣靈王遜
岷寇 戊戌行在刑部尚書吳忠等劾奏安

遠侯柳升奉命征勦山東妖賊唐賽兒等
聖諭諄諄指授方畧升命不恭不即隨道又賜
勅諭以賊徒憑高無水且乏資糧當坐困之
勿圖近功升全不留心及臨賊境又不設備
致賊夜斫營殺傷軍士時都指揮劉忠與升
夾攻忠身先軍士幾破賊壘升忌其成功而
不救援致忠力盡而斃賊遂得間遁去升遣
指揮馬貴等追之所遇騷擾不可勝言升亦
不問及備倭都指揮衛青聞賊圍安丘急躬

率所部兵晝夜兼行遂敗賊衆後三日升始
至反忌青有功而摧辱之人臣不忠莫此為
甚請治其罪 上曰朕每命將遣師必反覆
籌度丁寧告戒俾圖萬全今升方命失機媚
功忌能皆不可宥遂下升于吏 上以唐賽
兒久不獲慮削髮為尼混處女道士中遂命
法司凡北京山東境內尼及女道士悉至京
師評之

大明太宗文皇帝實錄卷之一百十五

永樂十八年夏四月己亥朔享太廟命皇太
子行禮 命行在刑部侍郎楊勉署山東布
政司事福建道監察御史鄧真署山東按察
司事 夜有星如雞子大赤色光燭地出帛
度東南行入右其尾跡炸散 壬寅交趾總
兵官豐城侯總兵官李彬遣都指揮張貴等
捕賊黎姪於鎮蠻府廷河縣禽偽龍虎大將
軍丁春等姪領餘黨遁彬勒兵窮搜禽姪及

其妻并賊將阮蛤杜德凌阮如雷等殺獲六
百餘人械姪等送京師 丙午重慶府永川
縣民蔣泰妻周氏一產三男事聞命如例優
給 癸丑朝鮮國王李陶遣陪臣鄭津等奉
表貢方物賀 萬壽聖節賜鈔帛有差 乙
卯 萬壽聖節 上御奉天殿受朝賀大宴
文武群臣及四夷朝使 戊午交趾總兵官
豐城侯李彬獲賊首偽羅平王范玉玉初敗
走復歸東潮州聚衆劫掠卒擒之械送京師

昭化郡主薨訃聞遣官賜祭葬主蜀獻王第
九女也 廣寧伯劉榮卒榮邳州宿遷人初
冒父名隸藉燕山左衛既受封始復其初名
榮素以驍勇聞從上舉義攻大寧徇山東戰
靈璧渡江至京師為前鋒榮果毅善戰所向
無敵由百戶累陞至中軍右都督永樂八年
從 上北征破本雅失里之衆於靖虜鎮即
軍中陞左都督十二年從征瓦剌率所部與
馬哈木戰下馬持短兵突入其陣殺獲獨多

師還受厚賞命守遼東訓練士馬守備甚嚴
十七年夏瞭望倭寇將至率兵馬步置左右
翼為伏先以弱兵誘寇長驅而前復起夾攻
自辰達酉寇不能支趨匿空堡中榮合兵圍
數匝盡覆之僵尸相藉斬首千餘級俘其餘
衆送京師封廣寧伯至是卒追封奉天靖難
推誠宣力武臣特進榮祿大夫柱國廣寧侯
謚忠武榮為將馭士卒有紀律明恩信於諸
夷款塞者綏輯備至既卒人感思之 湖廣

按察司副使靳義卒義字原禮河南淇縣洪
武中以大學生任北平道監察御史永樂初
出按北京糾治貪墨決疑獄滯訟皆得其情
吏民畏服日恒蔬食毫髮無取於下時 皇
太子居守北京賜魚米以旌其廉且語左右
曰靳義可謂真御史也未幾陞湖廣按察副
使首舉正按察使吳公悅都指揮王玉奸賊
之罪風紀肅然及是入覲以疾卒于京 已
未改兵科給事中黃完於工科 庚申暹羅

國王三賴波磨刺札的賴遣使臣奈霸納等
八十人貢方物賜之鈔帛遣中官楊敏等護
送還國仍賜其王錦綺紗羅等物 命行在
禮部定平山東反賊功賞尚書呂震議奏管
隊都指揮人鈔三百錠絲幣四表裏指揮人
鈔二百錠絲帛三表裏千戶人鈔六十錠絲
帛二表裏百戶所鎮撫人鈔百二十錠絲帛
一表裏旗甲以下人鈔百錠絹布有差有功
官軍各陞一級隨伍有賞無陞陣亡傷殘者

優給從之 辛酉陞戶部郎中張煥為山東
左布政使刑部郎中石執中為右布政使戶
部郎中蘇志高為左叅政禮部郎中王芳蓀
為右叅政署山東按察司事監察御史鄧真
為按察使河南道監察御史謝庸為副使刑
部主事洪順工科給事中韓璽俱為僉事
壬戌賞平山東反賊都指揮使衛青都指揮
同知王真各鈔四百錠絲帛四表裏其掌隊
指揮千百戶旗軍殺賊有功俱陞一級各與

賞賜隨伍官旗軍舍人皆賞陣亡傷故者特
加優給凡官軍千百十三人陞者五十九餘
賜賚有差 乙丑改長蘆鹽運使唐鑑於西
浙鹽運司湖廣按察司副使舒仲誠于貴州
按察司黜行在禮部右侍郎吾紳為廣東布
政司右叅政 丙寅雲南理府雲南縣土官
縣丞楊得關來朝貢馬賜之鈔帛 五月戊
辰朔 辛未命行在兵部凡使西洋忽魯謨
斯等回還官旗二次至四次者俱陞一級於

是陞龍江左衛指揮使朱真為大寧都指揮
僉事掌龍江左衛事水軍右衛指使唐敬為
都指揮僉事餘陞如例 夜有星如碗大赤
色燭光地起自壁宿東南行至近濁 壬申
端午節賜文武羣臣宴 甲戌置四川石泉
縣馬坪口叙州長寧縣鹽水壩江安縣板橋
蘆山縣八步關瀘縣蠶崖五巡撫司 乙亥
命故左軍左都督朱廣子瑛為羽林前衛指
揮使 丁丑勅交趾總兵官豐城侯李彬曰

叛寇潘僚黎利車三農文歷等迄今未獲未
審兵何時得息民何時得安宜晝夜盡心廣
為方畧早滅此賊以不負朕之委托 上懲
妖婦唐賽兒誦經扇亂遂命在外有司凡軍
民婦女出家為尼及女道士者悉送京師
辛巳瓜哇國西王楊惟西沙遣使臣惡烈添
祐等占城國王遣使通沙怕旦等及雲南木
宣慰司頭目不吞罕朶顏等衛頭目幹不見
等貢方物賜鈔幣有差 壬午命左軍左都

督朱榮充總兵官往遼東整飭兵事嚴固備
禦 交趾總兵官豐城侯李彬遣都指揮朱
廣勅捕偽開聖王阮多偽昭信侯平章軍國
重事譚興邦偽入內檢校平章司徒阮嘉偽
太師忠烈公常五等悉禽之并獲其妻子偽
印送京師 癸未湖廣鎮溪千戶所隆禽落
堂等寨苗蠻龍南木謂等作亂命總兵官都
督蕭授討平之 賜瓜哇國使亞烈添祐占
城國使通沙怕旦雲南木邦軍民宣慰司頭

目不答罕朶顏衛頭目幹不見貼吉里地面
土官頭目宿宋等宴 丁亥河南按察司僉
事門泰以貪黷誅 庚寅交趾右叅政侯保
率民兵禦賊死之左叅政馮貴亦以討賊戰
死保真定贊皇人由國子生為襄城贛榆博
興三縣知縣有善政初設交趾郡縣擇人撫
治陞保交州府知府又陞交趾右叅政時黃
江賊黎利剽掠郡縣保率民兵築堡于要害
禦之賊來攻保與戰不勝而死貴湖廣武陵

人舉進士為兵科給事中從英國公張輔征
交趾總兵餉克效勞勤還奏事稱旨陞交趾
右叅議提督金銀場陞左叅政能撫輯流民
歸附者衆有土兵二千餘人皆勁勇耐戰鬪
每出擊賊輒有功後中官馬騏等嫉之盡奪
其土兵及黎利犯衆強貴捕獨以羸卒數百
遇賊兵寡賊衆貴力戰而死保為政廉恕貴
有材畧其死也人皆惜之 甲午行在都察
院右副都御王彰言南陽當南北要衝宜選

都指揮一員鎮守於是命都指揮僉事莊興
為河南都指揮僉事掌南陽衛事 丁酉遣
官祭中雷 六月戊戌朔朝鮮國王李陶遣
陪臣南暉等貢馬及方物賜之鈔幣 命俞
詢為旗手衛指揮使詢交趾故都指揮同知
琪之子初琪府軍後衛指揮僉事陞四川都
指揮同知從征交趾番掌都司事以疾卒詢
應龍指揮僉事 上念琪歿于外特命為指
揮使 辛丑頒孝順事實書于文武羣臣及

兩京國子監天下學校先是 上命翰林儒
臣輯錄古鈔載籍所紀孝順之事可以垂教
者為書每事 上親製論斷及詩名孝順是
實又親製序冠之序曰朕惟天經地義莫尊
乎親降衷秉彝莫先于孝故孝者百行之本
萬善之原大足以動天地感鬼神微足以化
強暴格鳥獸孚草木是皆出于天理民之自
然非有所矯揉而為之者也然自古帝王公
卿下及民庶孝行見稱于當時有傳于後世

者不可殫紀往往散見篇籍朕嘗命侍臣歷
考史傳諸書所載孝行卓然可述者得二百
七十人復各為之論斷并系以詩次為十卷
名曰孝順事實俾觀者屬目之頃可以盡得
其為孝之道油然與其愛親之心歡然盡其
為子職則人倫明風俗美豈不有裨于世教
者乎尚慮聞見之不廣采輯之未備致有滄
海遺珠之歎後之君子苟能體朕是心廣搜
博采以續夫是編之作則于天下後世深有

賴馬 丙午夜北京地震 己酉陞廣東布
政司右叅議陳誠為右叅政命同中官郭敬
等使哈烈撒馬兒罕諸國時哈烈八荅黑商
于闐諸國皆遣使貢馬故遣誠賫勅各賜絲
幣等物 乙卯雲南曲靖軍民府亦佐縣故
土官知縣沙舊子沙存樂甸長官司長官刀
談來朝貢馬 丙辰召鎮薊州都督指揮李
昌掌山海衛事 己未夜有星如雞子大赤
色有光出西南雲中流火餘發光如盞大西

南行至雲中尾跡後散 辛酉廣電白縣佛
子等山徭首黃滿山等六十人來朝貢降香
諸物賜幣鈔遣歸 壬戌召陝西都指揮僉
事馬麟赴京侍衛於錦衣衛給月俸 夜有
星如盞大赤色光燭地出天津西南行入河
鼓尾跡後散 癸亥夜月犯井宿東扇南第
一星

大明太宗文皇帝實錄卷之一百十六

永樂十八年秋七月丁卯朔享 太廟命皇

太子行禮 遣官祭歷代帝王陵寢 庚午

遣指揮徐晟賁勅賜阿魯台等絲幣併送其

使臣都督哈木丁等還 壬申中軍都督府

右都督夏貴卒貴初名曲倫台應昌人為燕

山左護衛指揮僉事從定內難以功累陞山

西都指揮同知後陞中軍右都督同時都督

王哈刺把都兒者宛平人也初為百戶累從

上征伐積功至中軍都督僉事至是亦卒訃聞
俱賜祭賻卹有加 乙亥黔國公沐晟來朝
進白鹿 丙子貴妃王氏薨妃有賢德事
上及 仁孝皇后恭謹始終處宮闈之內肅雍
有禮藹然和厚綜理庶事絲毫不紊甚為
上所重 上晚年有疾間或急怒宮人懼譴妃
委曲調護蓋自 皇太子親王公主以下皆
倚賴焉至是以疾薨 上慟悼之輟視朝五
日賜祭謚昭獻命喪葬悉如洪武中成穆貴

妃故事 辛巳賑四川萬縣飢民四百三十
八戶給糧千一百三十四石 夜月食 丙
戌湖廣衡州府同知方素易卒素易江西樂
平人洪武中為盱縣知縣廉直平恕於義勇
為無所畏避吏民戴之 太祖皇帝特遣使
賚璽書勞以上尊及丁母憂者民伏闕奏乞
復任從之後陞浙江金華府知府治行益著
永樂初坐累謫戍興州未幾驛召至京以左
通政奉命諭交趾叛寇陳季擴却所遺黃金

二百兩白金三百兩還奏稱旨賜以楮幣復
命往思州廉察田宗鼎黃禧罪狀悉得其實
還除湖廣衡州府同知往捕桂陽州峒寇夕
銘衆詭言夕銘已死于兵素易不信已而果
獲送京師有舖卒訐年老惟一子今為虜所
噬素易為文檄山神明日虎死道側後有告
衡州民匿谷庶人摠貨財不首官者吏併劾
素易不舉坐是死獄中人多惜之 丁亥命
興安伯徐享後軍都督僉事吳誠領馬軍三

百人往開平備禦 戊子朝鮮國王李禔遣
陪臣柳晬等進箋貢方物賀 皇太子千秋
節 己丑 皇太子千秋節免賀禮 夜木
星犯天鐔西北星 庚寅旦壽星見 鎮守
大同總兵官都督劉鑑言大同左右等衛倉
糧支給將盡宜募商開中鹽糧以備邊用下
行在部議尚書夏原吉等議河東鹽每引米
三斗五升淮浙鹽每引米四斗俱令于大同
輸納不次支給從之 甲午行在禮部言四

川崇慶州民趙化保妻姜氏一產三男命循
例給米鈔 乙未復都指揮劉清官清先坐
事謫戍遼東立功至是宥而復之 夜有星
如盞大青白色尾跡有光出文昌東北行至
近濁後二小星隨之 丙申命劉忠為羽林
前衛指揮使忠父得先任指揮同知從征有
功陞山西都指揮同知卒忠應龍指揮同知
特命龍指揮使 八月丁酉朔日有食之
是日遣官釋奠先師孔子 陞陝西都指揮

僉事費瑾為都指揮使 戊戌祭 太社太
稷命皇太子行禮 命故掌錦衣衛都督僉
事劉忠子昊龍為本衛指揮使食祿不視事
庚子夜木星犯天罇東北星 壬寅北京
行部鄉試奏請考試官 上命左春坊左中
允兼行在翰林院侍講鄒緝侍讀王英考試
賜宴于禮部 是日應天府鄉試啓請考試
官 皇太子命翰林院修撰張伯穎左春坊
左贊善兼翰林院編修陳仲完考試賜宴于

本府 丁未命皇太子祭太歲風雲雷雨歲
鎮海瀆山川等神 遣官祭旗纛 戊申修
孝陵殿 永壽王尚炆薨訃聞輒視朝一日遣
官賜祭謚懷簡命有司治喪葬尚炆秦愍王
第五子也 己酉晉王濟燠第五子生賜名
美壇 癸丑夜有星如彈丸大赤色尾跡有
光出俟星旁行文餘發光如盞大西南行入
建星尾跡炸散後四小星隨之 乙卯蘇祿
國西王麻哈刺吒葛刺麻丁遣陪臣奉表貢

方物賜鈔幣遣還 辛酉設山東齊河縣晏
城驛平涼縣桃源驛 乙丑夜金星犯心宿
後星 九月丙寅朔 夜有星如雞子大青
白色有光出紫微西蕃內正北行至近濁
丁卯擢揚州府學教授蘭從善青州府學教
授林長楸寶雞縣學教諭徐永達俱為翰林
院編修甘泉縣學教諭張昱東阿縣學教諭
韓岫永年縣學教諭劉順俱為國子監博士
同吏科給事中陳山侍 皇太孫讀陞建寧

府知府劉敬為貴州布政司右叅政山西按察司僉事孫繼為右叅議江西道監察御史李琳為福建按察司副使 巳巳北京宮殿將成行在欽天監言明年正月初一日上吉宜御新殿受朝賀遂遣行在戶部尚書夏原吉賫勅召 皇太子令道途從容而行期在十二月終至北原京吉陸辭賜鈔二百錠 行在尚寶司丞范寧以罪謫交趾充吏 壬申遣定國公徐文景昌督修 皇陵殿宇 甲

戊重陽節賜文武羣臣宴 通政司左通政岳福言浙江仁和海寧二縣今年夏秋霖雨風潮壞長降等壩淪于海者五千餘丈東岸赭山巖門山蜀山故有海道近皆淤塞故西岸潮勢愈猛為患滋大乞以軍民修築從之夜有星如雞子大青白色尾跡有光出霹靂東南行天倉尾跡炸散 乙亥遣中官侯顯等使招納撲兒國時榜葛剌國王言招納撲兒國王亦不剌金數以兵撓其境故遣顯

等賫勅諭之俾相輯睦各保境土因賜之絲幣并賜所過金剛寶坐之地酋長絲幣設大道關提舉司置官如南京龍江提舉司專造舟艦 戊寅滿剌加國王母幹撒于的兒沙遣使段姑蘇刺什的蘇門答剌國王宰奴里阿必丁遣弟馬哈木沙等貢方物皆賜鈔貯絲紗羅金織文綺龍衣遣還 是日行在戶部尚書夏原吉賫勅至南京 皇太子宴原吉于文華殿賜白金五十兩及絲幣鞍馬

辛丑造徐王祭器 乙酉韃靼哈乂脫歡受不干廼馬歹等來歸奏願居京師命哈乂為正千戶脫歡弟副千戶受不干廼馬歹等為百戶賜予如例 通政司通政使賀銀卒銀台州臨海人洪武中為菴源縣學教諭用為陞宛平縣知縣 上起義靖難銀率縣僚吏給兵士芻餉永樂二年陞通政司右參議九年陞工部右侍郎坐事降工部營繕司主事十七年陞通政使銀初闕廉譽及為侍郎

坐累藉沒其貲甚厚後復官遂改行其卒也
家具蕭然 丙戌夜有二星如雞子大其一
青白色尾跡有光出天津南行至游氣其一
赤色尾跡有光出內階西行入閣道 丁亥
上命行在禮部自明年正月初一日始正北京
為京師不稱行在各衙門印有行在字者悉
送印綬監令預遣人取南京各衙門印給京
師各衙門用南京衙門皆加南京二字別鑄
印遣賫給 戊子夜月犯軒轅右角星 乙

未山東青州府諸城縣進龍馬縣民嘗有牝
馬牧于海濱者一日雲霧晦冥有物蜿蜒與
馬接至是產駒麟臆肉鬣體具龍文其色青
蒼蓋龍馬云

大明太宗文皇帝實錄卷之一百十七

永樂十八年冬十月丙申朔享太廟命皇

太子行禮丁酉榜葛刺國頭目者刺里丁

遣使賽亦得馬哈麻等貢名馬賜之鈔幣

庚子勅召周王橐以明年二月至京先是河

南中護衛軍丁俺三等屢告橐謀不軌上

未之信遣人詢察非妄故有是命夜有星

如雞子大赤色尾跡有光出五車西北行入

上台乙巳擢灤縣丞張翥為中書舍人

古麻刺朗國王幹刺義亦敦奔妻子陪臣隨
太監張謙來朝上表貢方物命禮部宴賚之
如蘇祿國王 巳酉金堂郡主薨訃聞賜祭
遣官治喪葬主蜀獻王第八女也 夜月犯
畢宿星 壬子 皇太子發南京 乙卯湖
廣辰州府同知劉叔苾卒叔苾廬陵人博學
有文和易而內廉介初為沅陵知縣以愛民
為務致勤綏撫縣介溪峒先是民多困徭竄
竄山谷叔苾至計其丁貲而役之加以綏撫

民悅流徙者悉歸復業有爭訟不治以訟為
開諭再三心服而後遣之官市物於民未嘗
急索民得從容而免於價涌之患陞北京刑
部員外郎時置刑部未久且兵饑相仍之後
庶務叢脞而工曹尤甚凡中外造作材物率
取具焉董作役者皆中官氣勢不可近六遭
官往往被箠擊叔苾以廉勤獨見禮於事或
叔苾言不可輒已召修永樂大典為副總裁
其去沅陵六年矣沅陵民累累陳乞還叔苾

遂陞辰州府同知一州七邑之民得叔慈如
得父母及建北京宮殿率郡民就役歲餘卒
於北京郡民在役者皆悲慕之具殮祭後滿
而歸相率載其喪葬辰州叔慈存心厚臨事
果處人誠居官蓋多惠政云 丙辰古麻刺
朗國王幹刺義亦敢奔言雖為國中所推然
未受朝命幸賜之詔仍其舊號封之給印誥
冠帶儀仗鞍馬文綺紗羅金織罷衣賜王妃
冠服及其陪臣等各賜綵幣表裏有差 是

日 皇太子過滁州登瑯琊山指示學士楊
士竒曰此醉翁亭故址也因歎歐陽脩立朝
正言不易得今人知愛其文而知其忠者鮮
矣蓋 皇太子為文章尤善修每曰三代以
下文人獨脩有雍容和平氣象尤愛其奏議
切直嘗命刊脩文以賜羣臣且諭之曰脩之
賢非止於文卿等當考其所以事君者而勉
之 庚申交趾總兵官豐城侯李彬遣交州
後衛指揮使方政追賊黎利遇於老撾忙心

河敗之利遁奔 壬戌命都指揮僉事馮興
鎮定州崔聚守紫荆關指揮使何虎掌定州
衛事俱賜鈔六十錠 癸亥甘露降 孝陵
松柏 皇太子採薦 宗廟遣人表獻 十
一月乙丑朔欽天監進永樂十九年大統曆
上御奉天殿受之頒賜諸王及文武群臣 署
中都留守司事都指揮同知張禮卒禮廬州
巢縣人父名長安衛百戶名老禮代之洪武
中陞遵化衛千戶從 上平內難累陞山西

都指揮同知已而命署中都留守司事在任
十有六年軍律嚴明人皆畏服至是暴疾卒
子琦襲鳳陽中衛指揮使 丙寅改浙江布
政司左叅政樊鎮右叅政程禧於湖廣布政
司陞監察御史李旭為湖廣按察使王增為
副使 是日 皇太子過鳳陽謁祭 皇陵
畢周步陵旁望 仁祖淳皇帝所遣石農器
碩侍郎張本學士楊士奇曰國家帝業所自
也徘徊久而退後既退陵下耆老進謁悉賜

酒饌慰勞之有知 太祖龍興時事者留從
容與言至夕加賜優厚已而碩士竒等歎曰
知當時者益鮮矣蓋皇太子重 祖宗事率
如此 丁卯 上謂行在兵部尚書方賓曰
明年改行在所為京師凡軍民合行事宜令
各官議擬以聞於是行在左軍都督薛祿掌
北京行後軍事廣平侯袁容等言今軍北京
留守行後軍都督府其簿書宜付後軍都督
府承掌印送禮部銷夜巡銅牌門禁鎖鑰付

中都留守掌出關勘合令中軍都督府編置
兵部公用印送印綬監收別置文簿付各
關為驗凡出關者通政司具奏赴印綬監填
給勘合照驗金吾左等十衛已為親軍指揮
使司其文移并守衛官軍俱合依南京上十
衛例其各衛官軍今在南京及行在衛分者
俱合取入原衛上直守衛南京留守五衛每
衛調官軍一半來北京開設留守五衛仍屬
五府分守城門及更番點閱皇城四門北京

牧馬千戶所候調南京軍至併之常山三護
衛見在北京其文移合依安東中護衛例悉
從之 命兵部以孝陵濟川廣洋水軍左右
龍江橫海天策英武飛熊廣武應天等衛番
守南京神策鎮南驍騎瀋陽虎賁豹韜龍驤
鷹揚興武龍虎武德和陽瀋陽右等衛調守
北京番守中左右前後五衛官軍分守南北
二京戊辰 上以明年御新殿受朝詔天下
曰開基創業興王之本為先繼體守成經國

之宜尤重昔朕 皇考太祖高皇帝受 天
明命君主華夷建都江左以肇邦基肆朕續
承大統恢弘鴻業惟懷永圖眷茲北京實為
都會惟 天意之所屬寔卜筮之攸同乃倣
古制狗輿情立兩情置 郊社 宗廟創建
宮室 上以紹 皇考太祖高皇帝之先志
下以詒子孫萬世之弘規爰自營建以來天
下軍民樂於趨事天人協贊景貺駢臻今已
告成選永樂十九年正月朔旦御奉天殿朝

百官誕新治理用致雍熙於戲天地清寧衍
宗社萬年之福華夷綏靖隆古今全盛之基故
茲詔示咸使聞知 己巳擢教授張舉訓導
吳鼎冠帶舉人柯暹監生朱禮俱為戶科給
事中教諭汪本成廣王瑩秀才彭彥虎余孟
貞俱為禮科給事中秀才鄭得皎俞得濟俱
為兵科給事中監生龍源彭璟俱為工科給
事中秀才丘宗舒伯治潘吉駱福楊珖汪樵
潘謙俱為中書舍人陸遂昌縣學訓導湯新

為宗人府經歷監察御史王果為湖廣按察
司副使兵科給事中汪淵為雲南按察司副
使改應天府戶部員外郎於順天府廣東右布政
使李汝器於貴州布政司河南右叅政阮嗣
於交趾布政司山西按察司僉事張思安於
湖廣按察司 壬申謫遼東都指揮李信等
巡邊以其守備不嚴致寇入境也 癸酉冬
至上御奉天殿受朝賀大宴文武羣臣及
四夷朝使 祭孝陵 命 皇太孫行禮

甲戌革北京苑馬寺先是悉用軍士畜馬比
調軍士保安守備馬悉散民間畜牧故罷苑
馬寺及其六監二十四苑 乙亥遣官賫勅
召 皇太孫期十二月終隨 皇太子至北
京增置霸州文安縣縣丞主簿 壬午革北
京刑部并所屬吏戶禮兵刑工六曹清吏司
照磨所司獄司其官屬俱調用及革行在戶
部刑部并南京戶部刑部之北京清吏司行
在都察院并南京都察院之北京道刑部增

置雲南交趾貴州三清吏司都察院增置雲
南交趾貴州三道改北京行太僕寺北京國
子監為國子監太僕寺北京行部所屬順天
等八府保安隆慶二州并直隸北京寶鈔提
舉司承運庫行用庫廣盈庫張家灣鹽倉檢
校批驗所俱隸戶部會同館大通關俱隸兵
部北京行部工曹清吏司織染所雜造局廬
溝橋通州白河三處抽分竹木局俱隸工部
北京五城兵馬指揮司析為東城西城南城

北城中兵馬指揮司革北京光祿寺及大官
良醞掌醢珍羞四署 陞山東安丘縣知縣
張旗為山東布政司左叅議縣丞馬橋為右
叅議并賜鈔幣龍衣先是反賊賓鴻等攻圍
安丘甚急城中素無兵備旗橋倉卒率民男
婦嬰城守死賊不能攻而官軍繼至賊敗走
事聞 上曰將帥虐民縱賊縣官能禦賊保
民人但堅志奮勵何事不濟旗等宜寵異之
故有是命 甲申命張成為羽林前衛指揮

使成父羨初為指揮同知陞浙江都指揮同
知卒成應龍指揮同知 上特命為指揮使

乙酉 皇太孫發南京 丁亥廣東布政司

言雷州海康遂溪二縣今夏颶風暴雨海水
漲溢傷民禾稼田租無徵者千六百餘石詔
悉免之 己丑秦府儀賓吳倫以罪追奪誥
命免為民 是日 皇太子過鄒縣見民男
女持筐盈路拾草實者駐馬問所用民跪對
曰歲荒以為實 皇太子惻然稍前下馬入

民舍視民男女皆衣百結不掩體竈釜傾仆
不治歎曰民隱不上聞若此乎願中官賜之
鈔而召鄉之耆老問所苦具以實對輟所食
賜之時山東布政使石執中來迎責之曰為
牧而視民窮如此亦動念否乎執中言凡被
災之處皆已奏乞停今年秋稅 皇太子曰
民且餓死尚及徵稅耶汝往督郡縣速取勘
飢民口數近地約三日遠約五日悉發官粟
賑之事不可緩執中請人給三斗曰且與六

斗汝毋懼擅發廩吾見

上當自奏也

辛

卯夜月掩金星

壬辰真定府曲陽縣人楊

得春蔚滿園等以妖術惑衆伏誅得春等素

不事產糈不服役官府有司將治其罪得春

變黃冠服滿園削髮披僧衣俱逃入晉以妖

術妖書符咒惑衆自稱善治兵甲能令人飛

行十里遂聚無賴號五百羅漢謀作亂事覺

有司捕獲械送京師即日皆棄市家產妻女

沒官 癸巳賜文武羣臣金織紵絲表裏各

一特命文淵閣大學士兼翰林院學士楊榮
金幼孜賜同尚書 是月賑山東青萊平度
等府州縣被水飢民凡十五萬三千七百三
十四戶給粟四十七萬九千一百十七石
十二月乙未朔 己亥 上視牲南郊 命
貴州思南等八府所選貢生員李政等送國
子監進學賜賚如雲南生例 壬寅臘日賜
文武羣臣宴 甲辰命故廣寧伯劉榮男端
龍廣寧伯 陞行在都察院左副都御史李

慶為工部尚書右副都御史王彰為右都御
史翰林院脩撰羅汝敬為侍講大名府知府
顧鼎為福建布政司右叅政長蘆鹽運司同
知賈杲為福建布政司左叅議監察御史葉
貞為江西按察司副使胡良誠為河南按察
司副使行人程遠為貴州按察司僉事改山
西右叅議莊謙才於湖廣布政司 設廣積
通積抽分竹木二局各設大使二員副使五
員俱隸工部 夜月犯畢宿大星 丙午陞

中書舍人鮑麟戶科給事中唐勝序班張賚
俱為尚寶司丞 丁未命中軍都督陳恭掌
中都留守司事 戊申擢河南中護衛軍丁
俺三為錦衣衛指揮僉事賜姓名趙誠以其
告周王橐不軌得實也 庚戌 上以將郊
祀禮命法司出繫囚輸役贖罪 癸丑順慶
郡主薨訃聞賜祭命有司治喪葬主蜀獻王
第十女也 行在兵部尚書方賓等言守衛
官軍舊有定數午門端門承天門長安左右

門俱全吾旗手府軍虎賁宿衛今因別有選
調其數不足宜增羽林濟州濟陽燕山四衛
軍士相參宿直從之 甲寅封中軍右都督
郭義為奉天靖難推宣力武臣特進榮祿大
夫柱國安陽侯食祿千一百石後軍右都督
薛祿為奉天靖難推誠宣力武臣特進榮祿
大夫柱國陽武侯食祿千一百石中軍都僉
事金玉為奉天翊衛宣力武臣特進榮祿大
夫柱國惠安伯食祿八百石左軍都薛斌為

奉天翊衛宣力武臣特進榮祿大夫柱國永
順伯食祿九百石子孫並世襲指揮使 改
北京刑部尚書郭賢為戶部尚書侍郎李昶
為右侍郎李友直為工部左侍郎崔衍為兵
部右侍郎 乙卯 皇太子 皇太孫將至
行在戶部尚書夏原吉先入奏 上喜賜鈔
一百錠命諸司先期分官出候于良鄉 戊
午立春 上御奉天殿文武群臣行賀禮賜
宴 己未 皇太子及 皇太孫至北京 辛

酉命駙馬都尉廣平侯袁容掌後軍都督府
事 朝鮮國王李禔遣陪臣曹備衡等奉表
貢方物賀明年正旦命禮部宴賚之 是日

皇太子奏前過山東境內遇飢民即令布政司
發粟賑之 上曰正是昔范仲淹之子猶能
舉麥舟濟其父之故舊况百姓吾赤子乎
壬戌陞金吾左衛指揮使孫奇為指揮僉事
羽林前衛正千戶吳福為指揮僉事 改鑄
北京夜巡銅牌 改北京牧馬千戶所為牧

牧馬千戶所 甘肅總兵官都督費瓚言四
川仙泉等監課司十八井洪武中撥監井衛
中納停罷已久請準見中川監則例每引加
米一斗五升共米三斗令於涼州衛倉中納
為便從之 癸亥享 南京太廟遣駙馬都
尉沐昕行禮初營建北京凡 廟社 郊祀
壇場宮殿闕規制悉如南京而高敞壯麗過
之復於皇城東南建 皇太孫宮東安門外
東南建十王邸通為屋八千二百五十楹自

永樂十五年六月興工至是成陞營繕清吏
司郎中蔡信為工部右侍郎營繕所副吳福
慶等七員為所正所丞楊信等六員為所副
吳木瓦匠金珩等二十三人為所丞賜督工
文武官員及軍民匠夫鈔糊椒蘇木各有差
以歲旱免直隸鳳陽府所屬州縣糧七千
九百九十二石 是歲天下戶九百五十三
萬三千四百九十二口五千一百四十四萬
六千四百三十四賦稅糧三千二百三十九

萬九千二百六石布帛百二十一萬一千八百八十三疋絲綿二十四萬六千五百六十八斤綿花絨五十八萬三千三百四十斤課鈔千八百二十二萬四千六百六十二錠金二千三百八十一兩銀三十萬二千五百四十四兩銅錢三千一百六貫銅二千一百八十八斤鐵四十八萬九千一百六十六斤鉛二萬七百八十斤珠砂千五百四兩海肥三十萬二十六索茶百四萬七千九百四十五斤鹽百四十一萬六千三百一十一引屯田子粒五百一十五萬八千四十八石馬八十九萬九千二百八十七匹 餽運北京糧六十萬七千三百二十八石 交趾上供絹二千二百六十五疋蘇木五千斤翠羽三千箇扇一萬把

卷一 賦類


千二百六十五 賦類 卷一 賦類

千二百六十六 賦類 卷一 賦類

千二百六十七 賦類 卷一 賦類

千二百六十八 賦類 卷一 賦類

千二百六十九 賦類 卷一 賦類



卷之三